

## TOMA DE POSESIÓN | PRESIDENCIA DA DEPUTACIÓN DE PONTEVEDRA

### *Intervención de Luis López Diéguez | Xoves 6 de Xullo de 2023 | 12.00 horas | Salón de Plenos do Pazo Provincial*

Bo día a todos de novo e reitérovos o meu agradecemento pola vosa presenza neste pleno solemne que marca o inicio do novo mandato provincial da Deputación de Pontevedra para os vindeiros catro anos e cuxa corporación tivo a ben elixirme como novo responsable desta importante institución, que leva os 187 anos da súa historia apoiando aos concellos, aos que pertencemos os 27 membros desta corporación e nos que radica a auténtica esencia deste organismo provincial.

Asumo a presidencia da Deputación de Pontevedra como unha grandísima honra e co máximo orgullo, pero tamén con absoluta humildade e con toda a responsabilidade para estar á altura do que precisan os 61 concellos da provincia e os 943.000 cidadáns que residen na mesma.

E efectivamente, esta mañá o pleno da corporación provincial acaba de escollerme como presidente, coas competencias e o compromiso que iso supón, pero eu son unha persoa, coma xa dixeran, que fuxe de protagonismos, que cre no equipo, no traballo conxunto e na colaboración como mellor xeito de facer política, polo que tedes en min a un compañeiro máis, un membro máis desta institución que, coma o resto, traballará arreo polo avance, o progreso e o crecemento da nosa provincia da man dos concellos.

E quero comezar os agradecementos polo presidente da Xunta, Alfonso Rueda, que hoxe nos honra coa súa presenza e ao que lle garanto, desde esta presidencia e desde esta institución, a máxima lealdade, respecto e colaboración. Tes o meu absoluto compromiso.

Creo que é responsabilidade de ambas administracións, a provincial e a autonómica, porque os cidadáns queren, os cidadáns esixen que falemos, que nos entendamos e que traballemos conxuntamente por eles. Admiten as discrepancias, as diferentes opinións, pero non queren leas nin enfrontamentos, piden colaboración e esixen solucións. Grazas pola túa asistencia, presidente.

E tamén o meu agradecemento aos demais membros da Xunta de Galicia que hoxe nos acompañan, como os conselleiros Román Rodríguez e Julio Comesaña ou os delegados Agustín Reguera e Ana Ortiz, cos que tiveron o pracer de traballar durante os últimos dous anos e medio. E por suposto aos expresidentes da Deputación hoxe presentes como Rafael Louzán e César Mera.

Tamén quero expresar o meu agradecemento ás alcaldesas, alcaldes e concelleiros que hoxe ateigan este salón en representación dos 885 cargos electos municipais que hai na provincia de Pontevedra. Quero agradecer o voso traballo e a vosa vocación de servizo público e poñerme, desde hoxe mesmo, á vosa disposición, plenamente aberto a colaborar con todos vós, con independencia das cores políticas, para sacar o mellor das 34 formacións políticas que teñen representación nas 61 corporacións municipais desta terra.

Por suposto quero referirme aos meus compañeiros do Grupo Provincial do Partido Popular polo seu cariño e xenerosidade, e agradecerlles que se sumen a esta inxente tarefa de desenvolver o goberno provincial e, por suposto, aos demais integrantes municipais da miña formación política, os 414 concelleiros, pola súa confianza para desempeñar esta gran responsabilidade. E tamén non vou esquecerme dos grupos socialista e nacionalista, cunha importante presenza nesta cámara e aos que me dirixirei posteriormente.

E non me podo esquecer das decenas de representantes da vida política, xudicial, empresarial, militar, educativa, social, cultural, deportiva, turística, dos corpos de seguridade, dos medios de comunicación e de calquera outra índole de toda a provincia de Pontevedra que hoxe están aquí neste acto histórico e que, coa súa presenza, enriquecen e fortalecen a normalidade democrática da provincia de Pontevedra e de Galicia.

E para rematar cos agradecementos quero abordar dúas cuestións fundamentais na miña vida: unha territorial, Rodeiro e a súa xente, o meu lugar no mundo; e outra persoal, xa referida á miña familia.

Hoxe é un día importante na miña vida e quero reiterar publicamente, unha vez máis, o meu cariño e compromiso por Rodeiro, a miña terra, e polos meus veciños. Alí nacín, alí sinto o alento da xente e alí, nesta lexislatura, defenderei aos veciños como orgulloso concelleiro. Quero agradecer a presenza de compañeiros da corporación e doutros veciños e deixarlle claro ao mundo que, dende a Deputación ou dende onde sexa, sempre teño presente a Rodeiro.

E a miña familia e amigos, principalmente os meus fillos, que sempre me acompañan e que non teño palabras nin xeito de agradecerlles nin de devolverlles todo o que fan por min, o cariño e o apoio que me transmiten sempre, de xeito incondicional, e os sacrificios que teñen que asumir, que son, teño que dicilo, o único "pero" que ten, supoño que para calquera, a vocación de servizo público. De verdade, moitas grazas, sabedes que sempre vos levo no meu corazón.

Hoxe, loxicamente, non é o día de afondar na nosa futura acción de goberno, aínda que, a falla de examinar o estado de todas as áreas, de todos os proxectos en marcha e das contas, está completamente deseñada, pero si me gustaría deixar clara cal vai ser a nosa filosofía de actuación

que, a ninguén se lle escapa, vai ser consecuente coas nosas políticas municipais, que son as máis representativas e coas que máis se identifican os cidadáns da provincia de Pontevedra, tal e como ditaminaron as urnas o pasado 28 de maio.

Creo, firmemente, que para construír o futuro hai que ollar ao pasado, manter a fortaleza dos cimentos desta institución construída, sobre todo, nos 44 anos da democracia recente, respectar o legado das anteriores corporacións e potenciar todo o bo feito durante este tempo.

E por iso, quero ter unha lembranza especial para os presidentes da Deputación de Pontevedra pertencentes ao actual período democrático: Federico Cifuentes, Mariano Rajoy, Fernando García, Xosé Cuiña, César Mera, Manuel Abeledo, Rafael Louzán e Carmela Silva. Para todos eles, o meu recoñecemento polo seu traballo e o meu compromiso de seguir buscando, incansablemente, o avance e progreso da nosa provincia.

E así, cun absoluto respecto ao pasado, que considero fundamental coñecer para poder construír un mellor futuro, a Deputación de Pontevedra vive hoxe un momento histórico despois de que os cidadáns, coa elección dos seus alcaldes e dos seus representantes nos concellos, decidiran que neste momento hai que abrir unha nova etapa e aplicar solucións diferentes e políticas distintas.

Basicamente, este cambio vaise orientar nunha acción de goberno pensada para os concellos e polos concellos. A Deputación de Pontevedra é o concello de concellos, é a casa dos concellos e a eles nos debemos. E por elo, unha das cuestións que queremos mudar é a cercanía con todas as administracións locais da provincia, polo que teño a intención de visitar todos os concellos, os 61, no prazo máis curto que permitan as obrigas desta institución, posiblemente nos primeiros seis meses de mandato.

A nosa provincia leva décadas de desenvolvemento e crecemento, leva moito tempo sendo unha referencia e queremos que o siga sendo, máis aínda se cabe, pero queremos que o sexa a través dos concellos e dos cidadáns. Creo firmemente nunha Deputación ao servizo pleno dos concellos e que lle ceda o absoluto protagonismo ás administracións locais.

E esta decisión de poñer aos 61 concellos da provincia no centro de todo pódese percibir tamén na propia configuración do novo goberno provincial.

Neste executivo hai sete alcaldes, e outros tantos concelleiros, algúns con responsabilidades nos seus gobernos locais e outros que exercen dende a oposición. E quero recalcar e destacar que a presenza dun 50% de alcaldes e alcaldesas no goberno provincial non é algo casual, supón un feito significativo e tradúcese nun cambio importante que non quero que pase desapercibido.

Porque vai supoñer unha lóxica variación no traballo e na xestión da Deputación de Pontevedra. A presenza de alcaldes e alcaldesas, ademais de pola súa indubidable valía, capacidade de xestión e coñecemento do territorio, tamén supón un símbolo de que no novo goberno da Deputación queremos que o protagonismo sexa principalmente dos concellos, porque son as administracións ás que nos debemos e ás que temos que servir e atender. Non podemos esquecer nunca que somos a casa dos concellos.

A Deputación debe acompañalos, axudalos, estar ao seu carón e resolverlle todas as cuestións ás que eles non cheguen, porque esta cámara, os seus 27 representantes, somos embaixadores e defensores dos concellos nesta casa. Somos nada máis e nada menos que os seus valedores, porque o eco da Deputación xurde, sempre, da voz dos concellos.

Pero tamén debe quedar claro que asumimos o goberno da Deputación de Pontevedra con total humildade e cun ánimo positivo e construtivo. Non vimos a destruír nada, non somos así, pero temos o dereito e a obriga de gobernar, e facelo do mellor xeito que sabemos. E por suposto imos desenvolver esta responsabilidade de xeito rotundo, respectando e potenciando o bo feito por todos os anteriores gobernos provinciais e corrixindo as cuestións que non funcionan ou non dan resposta axeitada ás necesidades dos concellos e dos cidadáns. Non vimos cun ánimo revisionista, pero tampouco imos aceptar, con total lealdade, políticas e decisións contrarias aos nosos principios.

E hoxe entramos nunha lexislatura decisiva para o futuro da provincia de Pontevedra, unha etapa na que teremos que afrontar os retos de futuro dun mundo que leva tempo en constante cambio e cunhas dinámicas que mudan a unha velocidade cada vez maior.

E a todo elo teremos e queremos darlle resposta dende a Deputación de Pontevedra, pero cremos que temos que facelo cos concellos, que terán nesta institución o acompañamento, o apoio e o financiamento necesarios para atender á sociedade. Porque si, porque creo que aos concellos temos que coidalos máis, sen sectarismos, e desde este goberno provincial imos tratar de coidalos máis.

E os retos que debemos afrontar teñen unha dobre vertente, porque ás veces o novo tende a substituír ao vello, e eu creo que unha institución tan potente como a Deputación de Pontevedra ten capacidade para non deixar ningunha responsabilidade atrás.

- A ninguén se lle escapa que na Deputación temos que traballar arreo a prol da igualdade real e efectiva entre mulleres e homes, e imos seguir dando pasos para que chegue máis cedo que tarde, porque é unha necesidade imperiosa e irrenunciable para que teñamos unha mellor sociedade;

- E a ninguén se lle escapa que imos ter que traballar a prol do medio ambiente e do coidado do planeta, porque as consecuencias do cambio climático, que ás veces parecen moi lonxanas, xa as temos nesta terra cos primeiros avisos de ameazas de seca, entre moitos outros efectos;
- E a ninguén se lle escapa que temos que apostar máis e máis pola demografía nun territorio cada vez máis envellecido que precisa de máis e mellores accións e políticas de conciliación para tratar de reverter esta situación;
- E a ninguén se lle escapa que temos que potenciar a nosa cultura e a nosa lingua, como sinais de identidade fundamentais para posicionarnos nun mundo cada vez máis global.
- Pero tampouco se lle escapa a ninguén que tamén temos que apostar pola promoción económica, a xeración de riqueza, o asentamento de empresas ou a creación de emprego, porque estamos a falar do motor que move a provincia e dos postos de traballo que permiten que cada cidadán poida desenvolver unha vida digna;
- Nin tampouco podemos deixar de lado o coidado, mellora, mantemento e investimentos nas nosas infraestruturas, nos nosos servizos públicos que tantos anos levan funcionando e nas nosas estradas como eixos de comunicación e mobilidade entre territorios. Porque unha estrada é moito máis que unha estrada, unha estrada é xeración de riqueza, é traballo, é unión, é relación social, é vida;
- E tamén temos que traballar e recuperar os apoios ás asociacións e colectivos veciñais, sociais, musicais, culturais, deportivos, sociosanitarios... porque nun mundo que tende á individualización, creo que temos que seguir creando comunidade e potenciando as relacións, posto que son o eixo da condición humana;
- E tamén temos que seguir apostando, traballando e investindo en cuestións que poden considerarse de vello, pero que nunca deixaron de estar presentes nas nosas vidas e que temos que fortalecer porque forman parte da nosa forma de ser e de estar no mundo, e falo das políticas sociais, do turismo, do deporte, da cooperación, da xuventude, das relacións fronteirizas...

Anteriormente, referinme ao Grupo Provincial do Partido Popular e tamén quero dirixirme aos outros dos grupos desta cámara: o Partido Socialista e o BNG, que desempeñaron o goberno provincial durante os últimos oito anos.

Quero expresarlles o meu recoñecemento polo traballo realizado nesta institución. Como todos, tiveron os seus acertos e os seus erros, pero, con independencia das diferenzas ideolóxicas e de xestión que temos todas as forzas políticas e que enriquecen a democracia, creo que é de xustiza recoñecer o traballo. Porque toda persoa que desempeña un cargo público, e máis cando ten responsabilidade de goberno, realiza un traballo importante, con sacrificios, que creo que hai que destacar. Por elo, o meu agradecemento por este labor.

E quero agradecer tamén a César Mosquera e a Carlos Font, en representación do anterior goberno provincial e hoxe de novo deputados desta cámara, o traballo realizado no traspaso de poderes, algo que considero fundamental para o axeitado funcionamento desta institución.

E de cara ao futuro, quero pedirilles aos dous grupos da oposición que sigan traballando arreo pola provincia, que sigan facendo propostas e que sigan colaborando co desenvolvemento e progreso deste territorio.

Creo que o labor da oposición, como demostrou o Grupo Popular nestes oito anos, é fundamental para que construíamos a provincia entre todos, e sei que ambas formacións, coas que temos diferenzas pero tamén puntos en común, van seguir aportando e contribuíndo ao futuro da provincia e da Deputación.

Tedes nesta presidencia e neste goberno provincial a man absolutamente tendida e un ánimo máximo de colaboración. Sempre estarei disposto a sentarme, dialogar, escoitarvos e debater polo ben da provincia porque, como dixen ao principio, serei un compañeiro máis.

Sei que chegaremos a acordos e que tamén haberá discrepancias, pero sei que teredes a mellor das vontades, coa defensa dos vosos posicionamentos políticos, para que a Deputación de Pontevedra teña, ata o ano 2027, a mellor lexislatura da súa historia. De antemán, quero trasladarvos o meu agradecemento polo traballo dos próximos anos.

E para rematar quero dirixirme aos traballadores da Deputación de Pontevedra. Cóntame, polos meus anos de alcalde e polo meu anterior período como deputado provincial, que son uns magníficos profesionais e uns grandes servidores públicos. Creo que, máis alá de quen governe esta institución, eles son o corazón e os pulmóns desta casa e quero expresarlles o meu agradecemento polo seu traballo e amosarlles a miña absoluta confianza en que, neste tempo novo, van seguir sendo fundamentais para atender aos pontevedreses.

E nada máis. Moitas grazas pola confianza para este tempo novo e, desde este momento, pónome á absoluta disposición de todos, en corpo e alma, para entendervos e atendervos.

Hoxe comeza un futuro esperanzador e agardo que o percorramos entre todos.

Vémonos pola provincia!